

LI VECCHI

Nuddu li viri chiù, sunnu scartati
finiu a nenti lu sò sacrificiu
puru di li figghioli sù schifiati
quannu li figghi nun'hannu giudiziu,
virennusi di tutti disprizzati
qualcunu si v'ammazza pi dispriziu;
e chiddi chiù prudenti, chiù assinnati
la maggiuranza morinu all'uspiziu.

Ma forsi pi na singula ragioni
qualcunu o patri n'casa l'arrisetta
maritu e mogghi, sceglinu n'agnuni
ciàbbersanu na seggia e si ciàsetta
passa li iorna com'un passuluni
nuddu lu viri, nuddu lu rispetta;
e v'è finisci comu un lumiuni
ci spreminu lu sugu e si v'è ghetta.

AI NOVELLI SPOSI

Gintili spusi, tanti auguri
vi vegnu a portu di la parti mia,
paci, saluti, mill'anni d'amuri
campari sempri cu leta armunia;
cunsidirativi comu d'ù ciuri
chiantati nta la stessa casiria;
cu amuri, fidiltà e tantu affettu
criativi un billissimu mazzettu.

Oggi pi vui è na festa eccellenti
la megghiu festa di la vostra vita,
siti atturniati, d'amici e parenti
pi fistiggiari sta gioia infinita;
si l'haiu a diri, spassiuatamenti
la megghiu festa, è quannu si marita
chi nfacci a Diu lu nostru Suvranu
cu tant'affettu vi dastu la manu.

Ed'ora siti beddi e maritati
haviti libirtà quantu vuliti
nun siti chiù di nuddu cuntrullati
comu ddù tempu chi fustivu ziti;
pigghiativilli tutti li scialati
ririti puru mentri chi durmiti;
si qualchi vota ncrisi vi truvati:
UN GRAN VASUNI, E TUTTU RISULVITI.

Offru di novu li megghiu auguri
mill'anni almenu di filicità
vulirvi beni ne tempi futuri
qualunqui tempu si traversirà;
viriti, chi c'è tempi tristi e duri
sulu l'amuri li supportirà;
facitivi guidari du Signuri
e sia fatta, la sò vuluntà.

LU CUMANNU DI LA CASA

Si vi lu ricu pari fissaria
eppuru vulennu essiri sinceri
cu la mè arti, cu la mè mastria
cu bonu versu, cu boni maneri,
senza ch'u ricu pi spavalderia
l'haiu rittu sempri, lu ripetu arrieri:
iò tegnu lu vastuni ncasa mia
basta ch'un cuntrarisciu a mè muggheri.

Però si senza mai la cuntrarisciu
quantu gran tappinati chi m'arruscio
nun c'è na vota chi la passu liscio
ormai lu sò sistema lu conuscio
o scappu di la casa e scumpariscio
o mi mettu a n'agnuni musciu musciu;
« mi veni a trova dunni v'ha finiscio
a scacciaperi senza fari scruscio ».

L'autru iornu c'eranu pirsuni
iò pi l'affari mè era siddiatu
araciu araciu nescio a l'ammucciuni
mi misi nta un'angulu appaltatu
quannu chi mi scupriu na d'agnuni
mi dissi: chi fai? — sugnu ncazzatu —;
« m'abbrazza e ch'un grannissimu vasuni
pigghia, e mi fici cariri mpiccatu ».

Nun vi lu ricu chiù comu finiu
vuiatri stessi vi lu mmagginati
perciò inutilmenti ci mprisio
mi cunvinci cu la sò nvirmitati;
e siddu chi mi ncazzu e m'arrabbio
picca sè misi ristamu ncazzati;
« allura fazzu finta chi nun viu
e stamu mpaci pi l'Eternitati ».

VINNIGNA, AMURI E MATRIMONIU

Tanti vinnignatura misi a schiera
di matinata appena iornu chiaru,
cughianu racina a leta cera
ne vigni di don Peppi Catanzaru,
puru la figghia di don Peppi c'era
cu Giovanninu, figghiu du zù Saru,
ma prima ch'arrivaru a cantunera
sti dui picciotti si vasaru.

Di na rappa muscateddu
bedda bruna e ncuraddata
ni sazzau un cucciteddu
era ruci nzucarata,
ni rumpiu nautru sgagniddu
ci ni retti puru a iddu.

Poi quannu c'arrivaru a cantunera
dda picciuttedda chiama a sò papà,
ci dissi emu a turnari a la trazzera ?
o siguitammu a cogghiri di ccà,
rispusi: comu regula e manera
ciàviti a ghiri a partiri di ddà;
chi ghennu a scarricari poi pigghiati
dunni li zucchi sunnu vinnignati.

Ddi dù coccia di racina
bedda bruna ed'ammilata
mi lassaru sta matina
la mè vuca nzucarata;
ddà picciotta rispunniu
dissi: aspetta, quantu viu.

Cu n'amuri e tantu mpegnu
natra vota si vasaru,
si tù voi sta sira vegnu
ddà d'arrè lu addinaru,

idda dissi: nò ddà fora,
veni rintra a pagghialora.

E parlannu beddu chiaru
ddi d'uri namurati
ddà iurnata la passaru
ntra carizzi e ntra vasati
pi manciari fannu un pattu
tutti rui no stessu piattu.

Cu lu cori assai cuntentu
dda iurnata si chiuriu
idda v'è all'appuntamentu
ma appena chi trasiu
assittatu nta na gnuni
ci trovau a dd'uri arzuni.

Forti forti s'abbrazzaru
li s'è labbra si iungeru,
na ddà pagghia si curcaru
nfini poi s'addummisceru,
dunni poi n'è matinati
li truvau ddà abbrazzati.

Ma lu patri vota nfretta
tù nun scappi e mancu fui,
curri pigghia la scupetta
p'ammazzalli a tutti rui
tanta genti lu firmaru
la scupetta c'è livaru.

Dissi Turi Cargelosi
ma p'chè t'è cunsumari ?
quannu chisti sunnu cosi
chi si ponnu accummirari,
rispunn'iu don Liboniu
si farà lu matrimoniu.

Scrivitillu nta la mpigna
una cosa c'è di fari
a finuta la vinnigna
s'hannu a ghiri a maritari,
s'invitati puru a mia
vegnu e fazzu cumpagnia.

E ddà giuvini binigna
cu lu figghiu du zù Saru
a finuta da vinnigna
tutti rui si maritaru
e lu preu di ddù patri
mmagginatilu vuiatri.

Fici sempri stringi e vasa
letu com'un picciriddu
si li tinni a la sò casa
e cunvivinu cu iddu
ntra l'affettu e ntra l'amuri
biniritti du Signuri.

Cari amici, ricurdati
chi si fici un gran fistinu
nmezzu a tutti l'invitati
c'era puru lu parrinu
una festa a grandi oltranza
cu balletti e cuntrananza.

L'invitati tutti a mensa
quantu carni e maccarruna
sbacantaru na dispenza
vutti stipi e carratuna
e ddà festa si chiuria
cu sta bedda Puisia.

LU VINU

Viriti la virtù ch'avi lu vinu
servi la mensa di ogni suvrano
cu l'ostia lu cunsacra lu parrinu
e teni sempri allegru o sacristanu,
ni vivi l'impiegatu, u cuntadinu,
lu mericu, ngigneri e l'artigianu;
nta nudda casa si teni un fistinu
si nun c'è vinu a purtata di manu.

O vinu, vinu quantu sì putenti
lu nutrimentu sì di tanti e tanti,
ti vivinu li ricchi e li pizzenti
li principi, baruna e li rignanti;
ti vivinu li sbirri e delinquenti
tj vivinu li sperti e li gnuranti;
iò nun ti vivu disgraziatamente
però ti vogghiu ccà sempri davanti.

ANNU NOVU

Rifardu, disonestu, dilinquenti,
ingannaturi di l'umanitati
cu quali facci, novu ti prisenti ?
quannu porti li stissi cunnutati
li stissi modi, li liniamenti,
li stessi misi, li stessi iurnati,
li stessi peni, li stessi turmenti
e sempri sti buffuna strati strati.

Pi la cumparsa tua sempri la stissa
capivi ch'è minzogna longa e grossa
mpignassi la mè vita pi scummissa
la fai apposta sta tò falsa mossa;
a la cristianità pigghi pi fissa
ad'unu, ad'unu ni porti a la fossa.

LU VIDDANU NCAMPAGNA

Lu sintiti ntra lu scuru
chi si smovi e si rimina
pirchè sonna criaturu
chi vinnigna o chi simina.

Sduna versu mezzanotti
quannu spunta la puddara
poi chiama li picciotti
la simenza si prepara.

Sia Peppi o Salvaturi
comu l'arba ncelu acchiana
cu l'aratra o lu tratturi
lu viriti a la virsana.

Tuttu liornu fina a sira
ma però nun'è cuntenti
s'a li casi un si ritira
dopu chiusu lu punenti.

Mischineddu assammaratu
certi voti quannu chiovi
tuttu lordu azzuddaratu
ma di l'antu nun si movi.

Quantu affannu, quantu stentu
pi sti poviri viddani
chi siminanu furmentu
pi purtarini lu pani.

Ma lassativi prigari
chi difrunti a stu viddanu:
ni duvemu dinucchiari
e vasaricci li manu.

Forsi no 1955 o 56, un ricordu chiui quali misi, forse versu settembre o ottobre. A ddù tempu mè muggghieri ci facia a pulizia a Cassa Rurali di Paceca. Na sira mi misi ntavula un giornali. Lu pigghiu, leggiu u titulu (Poi tu cuntù) e chiddu ch'un ti piaci ti lu cangi. Mi piaciu, fici na Puisia e cià mannai.

Iò trasiri vulissi na ssi fili
macari additta, darrè lu purtuni
però nun sugnu un Pueta di stili,
comu Dinaru, Palmeri e Mannuni
ncunfruntu a vui scinziati e gintili
sugnu munnizza ittata al'agnuni;
di pinna e nchiostru sugnu u capu vili
ma spataccinu di zappa e picuni.

A prossima quinnicina m'arriva u giornali e c'era puru a puisia chi ci mannai iò stampata. No giornali chi sciu u primu dicembri u diritturi prigava tutti l'abbunati di rinuvari l'abbunamentu entru dicembri. Mi parsi giustu farimi puru prisenti e ci mannai na cusuzza di picciuli e sta puisia.

Mi fici finalmente ricurdari
na cosa chi da tempu ia pinzannu,
l'abbunamentu avissi a cuminciari
pi tutti a lu principiu di l'annu
ci mannu ora stessu li rinari
si li tegnu nsacchetta si ni vannu;
sustinituri lu vurria passari
la rimanenza frà iorna cià mannu.

Ni dissi chi ni fà un cumplimentu ?
però un sfruttannu lu nostru giornali,
assà nun criri cù fazzu pi ntentu ?
ma sulamenti pu'un'attu giniali;

iò senza nenti puru m'accumentu
e criu chi saremu tuttu uguali;
cun forti abbrazzu e vasuna u spaventu
ciàgguriu di farsi un bon NATALI.

Siccomu i picciuli chi ci mannai unn'abbastavanu pi sustinitori, havia u pinzeri di mannaricci a rimanenza, u rui di gennaiu si maritau na figghia mia, iò era mpagghia, ci mannai i soldi cu sta puisia.

Signor Dinaru, basta chi nun riri
e nternu sò nun fà mali pinzeri ?
rubavi a mè mogghi milli liri
ci li truvai dintra d'un biccheri,
però vulissi fattu stu piaciri
agghiungili cu chiddi d'av'anteri;
si sinn'adduna e mi farà chi diri;
mi la spirugghiu iò cu mè mughieri.

Mi mporta sulu, chi resta cuntentu
senza na lira, iò sempri ci staiu,
di restu debiti n'hau un spaventu
chissi l'agghiungiu a li mrogghi chi haiu;
significa accussi, l'abbunamentu
cumincia di lu primu di ginnaiu ?
assà mi rici, caru diritturi
ssà quota basta pi sustinitori ?

RISPOSTA

Caru Guglielmu miu nun ti scantari
pi li soldi rubati a tò mughieri,
idda cu mia si vosi cunfirari
chi li rinari dintra lu bicchieri ?

la sira avanti li fici vulari
di la tò tasca, misa a quattru peri;
pirchè ogni sira comu t'addummisci
lu portafogghiu ti l'alligirisci.

Perciò tuttu summatu amicu caru
lu sceccu riturnau a lu patruni
e tù facisti un'attu tantu raru
dignu di un veru e granni Puituni,
ssù tò bicchieri ch'è sarvadinaru
vardalu spissu e quannu poi t'adduni
chi carti ci ni sunnu un cintinaru
mi li spirisci tutti al'ammucciuni.

RISPOSTA

Sugnu ncazzatu, anzi ncazzatuni
di li capiddi finu a li stivali
ma nò pirchè mi rissi Puituni
comu si fussi un Pueta mundiali ?
fù sulu pi nà simplici ragiuni
chi forsi lei unn'ù fici pi mali;
ci mannai li soldi al'ammucciuni ?
e mi lu scrivi supra lu giornali ?

Mè muggheri dintra era
lu giornali lu liggiu
e li ghicari e bicchera
pi currivu li rumpiu.
Divintau na liuna
li capiddi si tirava
cu na ranni scupatuna
a mumentu m'ammazzava.

Perciò capisci diritturi caru
pi lei cumminarimi st'erruri ?

nun sulu unn'hiau chiù sarvadinaru
ma li casciana ora si li chiuri,
e pi nautru fattu tantu chiaru
ch'ancora si ripeti tutti l'uri;
dicinu tutti chi lu picuraru
na vota sulu vitti a lu Signuri.

*All'annu appressu a stessa situazioni: u diritturi nautra vota
prigava di rinnuvari entru dicembri, e mi presentu:*

Caru zù Peppi m'hav'a pirdunari
siddu c'arrivu ntall'ultimi uri
com'ora tanti sforzi un pozzu fari
pirchè nun voli ddù porcu dutturi
però sta vota unn'u fici passari
fici un gran sforzu di fari fururi
l'unica spinta ch'un pozzu scurdari
ruppi cuddaru, canceddi e pasturi.

Pirchè quannu m'avanzu un mi pentu
s'un trasu pazzu o nun moru cunzuntu
cu mpisa, mpegnu, suffirenze e stentu
stringennu la curria all'urtimu puntu
dopu trè misi di cummattimentu
ora lu ricu senza chi m'affruntu
« mannu li rana arrè d'abbunamentu
sustinituri di lu pò tù cuntù ».

Però zzù Peppi ci lu raccumannu
di raggiunari cun pocu di sali
nun fari comu fici or'all'annu
chi mi lu scrissi supra lu giurnali ?
senza mai li fimmini lu sannu
sicuramenti mi finisci mali
« e mi fannu passari capu r'annu
o campusantu o puru a lu spidali ».